



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno DLXXVII. ad annum DXC.

Parisiis, 1644

Epistola LV. Gregorii Papae I. Ad Severvm Episcopvm. Visitationem
Ariminensis ecclesiae iniungit.

urn:nbn:de:hbz:466:1-15221

De stipendiis in dedicatione ecclesiæ sanctæ Mariæ dandis.

Gregorius Petro subdiacono.

FESTIVITATIBVS sanctorum desiderabiliter insistentes, præsentis præceptionis nostræ paginam ad experientiã tuam necesse duximus dirigendam: indicantes ei, oratorium beatæ Mariæ, quod nuper in cella fratrum ædificatum est, vbi Marinianus abbas præesse dignoscitur, Augusto mense disposuisse nos adiuuante Domino summo opere dedicare, quatenus cœpta nostra operante Domino debeant consummari. Sed quia cellæ ipsius tenuitas exigit, debere nos in ipsa diei festiuitate concurrere, propterea volumus, vt ad celebrandam dedicationem dare debeas ad erogandum pauperibus in auro solidos decem, vini amphoras triginta, annonæ modios ducentos, olei orcas duas, verueces duodecim, gallinas centum, quæ tuis possint rationibus postmodum imputari. Statim ergo fieri hæc nulla moræ interiectione constitue, vt vota nostra Deo auctore celerem sortiantur effectum.

Visitationem Ariminensis ecclesiæ iniungit.

Gregorius Severo episcopo.

FRATERNITATIS tuæ edocti sumus epistola, in persona Odeatini de electione episcopatus aliquos consensisse: quem quoniam nos non concedimus, in eius non debent immorari persona. Sed habitatoribus eiusdem ciuitatis edicito, vt si in eadem ecclesia dignum ad hoc opus inuenerint, in ipsius cuncti electione declinent. Alioquin præsentium tibi portitor personam, de qua ei diximus, indicabit, in cuius debeat fieri electione decretum. Vos etenim in eiusdem visitatione ecclesiæ estote solertes atque

soliciti, vt & res eius illibata seruentur, & vtilitates vobis disponentibus more solito peragantur.

EPISTOLA LVI.
GREGORII PAPÆ I.

AD VRSICINVM DVCEM, CLERVVM ET PLEBEM ARIMINENSEM.

De episcopo eligendo.

Gregorius Vrsicino duci, clero, ordini & plebi Ariminensis ciuitatis.

DILECTIONIS vestræ quam sit in expectatione pontificis prona deuotio, directæ relationis textus insinuat. Sed quia ordinatorem vehementer in his oportet esse sollicitum, nostræ in hoc vtique cura deliberationis inuigilat. Ideoque caritatem vestram scriptis præsentibus admoneamus, vt nullus se debeat pro Odeatini ad nos fatigare persona: sed si in eadem ciuitate qui ad hoc sit vtilis inuenitur, ita vt a nobis reprehendi non possit, vestra concurrat electio. Si vero ad hoc dignus inuentus non fuerit, nos in quo pariter debeatis præbere consensum, præsentium diximus portitori. Vos autem vnanimis orate fideliter, vt quicumque fuerit ordinandus, & vobis vtilis possit existere, & dignum Deo nostro sacerdotale exhibere seruitium.

EPISTOLA LVII.
GREGORII PAPÆ I.

AD ANTHEMIVM SVBDIACONVM.

Palatinam illustrem feminam pro sustentatione commendat.

Gregorius Anihemio subdiacono.

SI proximorum necessitatibus habita compassione benigna mente concurrimus, nostris procul dubio necessitatibus clementem Dominum reperimus. Palatina siquidem femina illustris, continua hostilitate insinuauit se plurimis necessitatibus subiacere. Propterea experientiæ tuæ præsentis auctoritate præcipimus, vt pro sustentatione eius annuos triginta solidos dare non differas, qui tuis postmodum possint rationibus imputari. Ita ergo fac, vt & tu bene ministrando mercedis commodum percipias, & nostra ad effectum præcepta perducas.

Ee iij